

清·彭定求

全唐詩

拾壹

延边人民出版社

全唐诗

[清] 彭定求 等编

11

延边人民出版社

全唐诗卷五百七十二

贾岛

哭柏岩和尚

苔覆石床新，师曾占一作吾师去
几春。写留行道影，焚却坐禅身。塔
院关松雪一作路，经房锁隙尘。自嫌
双泪下，不是解空人。

山中道人

头发梳千下，休粮带瘦容。养雏
成大一作老鹤，种下作高松。白石通
宵煮，寒泉尽日春。不曾离隐处，那得
世人逢。

就可公宿

十里寻幽寺，寒流数派分。僧同
雪夜坐，雁向草堂闻。静语终灯焰，余
生许峤云。由来多抱疾，声不达明君。

旅游

此心非一事，书札若为传。旧国
别多日，故人无少年。空巢露叶落，疏
牖水蛩穿。留得林僧宿，中宵坐默然。

送邹明府游灵武

曾宰西畿罢，三年马不肥。债多
平一作凭剑与，官满载书归。边雪藏

行径，林风透卧衣。灵州听晓角，客馆
未开扉。

题皇甫荀蓝田厅

任官经一年，县与玉峰连。竹笼
拾山果，瓦瓶担石泉。客归秋雨后，印
锁暮钟后。久别丹阳浦，时时梦钓船。

赠王将军

宿卫炉烟近，除书墨未干。马曾
金镞中，身有宝刀瘢。父子同时捷，君
王画阵看。何当为外帅，白日出长安。

下第一本有别人二字

下第只一作惟空囊一作鬓毛苍，
如何住一作裴回悬帝乡。杏园啼百
舌，谁醉在花傍？一作莺声寒食后，人
醉曲江傍。泪落故山远，病来春草长。
知音逢一作酬岂易一作岂易别，孤棹
负一作复三湘。

寄贺兰朋吉

往往东林下，花香似火焚。故园
从小别，夜雨近秋闻。野菜连寒水，枯
株簇古坟。泛舟同远客，寻寺入幽云。
斜日扉多掩，荒田径细分。相思蝉几
处，偶坐蝶成群。会宿曾论道，登高省
议文。若吟遥可想，边叶向纷纷。

忆吴处士

半夜长安雨，灯前越客吟。孤舟行一月，万水与千岑。岛屿复云起，汀洲芳草深。何当折松叶，拂石剡溪阴。

哭孟郊

身死一作没声名在，多应万古传。寡妻无子息，破宅带林泉。冢近登山道，诗随过海船。故人相吊后，斜日下寒天。

送崔定

未知游子意，何不避炎蒸。几日到汉水，新蝉鸣杜陵。秋江待得月，夜语一人听。恨无僧。巴峡吟过否，连天十二层。

寄白阁默公

已知归白阁，山远晚一作晚晴看。石室人心静，冰潭月影残。微云分片灭，古木落薪干。后一作夜夜谁闻一作风飘磬，西峰绝顶寒。

雨后宿刘司马池上

蓝溪秋漱玉，此地涨清澄。芦苇声兼雨，芰荷香绕灯。岸头秦古道，亭面汉荒陵。静想泉根本，幽崖落几层。

送朱可久归越中

石头城下泊，北固暝钟初。汀鹭潮冲一作冲潮起，船窗月过一作过月虚。吴山侵越众，隋柳入唐疏。日欲躬调膳，辟来何府书。

送田卓入华山

幽深足一作入暮蝉，惊觉石床眠。

瀑布五千仞，草堂瀑布边。坛松涓滴露，岳月沈寥天。鹤过君须看，上头应有仙。

送董正字常州觐省

相逐一行鸿，何时出碛中。江流翻白浪，木叶落青枫。轻楫浮吴国，繁霜下楚空。春来欢侍阻，正字在东宫。

酬姚少府

梅一作海树与山木，俱应摇落初。柴门掩寒雨，虫响出秋蔬。枯槁彰清镜，孱愚友道书。刊文非不朽，君子自相于。

送无可上人

圭峰霁色新，送此草堂人。尘尾同离寺，蛩鸣暂别亲一作秦。独行潭底影，数息树边身。终有烟霞约，天台作近邻。

送李骑曹一作曹

归骑双旌远，欢生此别中。萧关分磧路，嘶马背寒鸿。朔色晴天北，河源落日东。贺兰山顶草，时动卷帆一作旂风。

送乌行中一作有还字石淙一作琮别业

寒水长绳汲，丁铃数滴翻。草通石淙脉，硯带海潮痕。岳色何曾远，蝉声尚未繁。劳思当此夕，苗稼在西原。

送觉兴上人归中条山兼谒河中李司空

又忆西岩寺，秦原草白时。山寻

樵径上，人到雪房迟。暮磬一作壑潭泉冻，荒林野烧一作火移。闻师新译偈，说拟对旌麾。

寄无可上人

僻寺多高树，凉天忆重游。磬过沟水尽，月入草堂秋。穴蚁苔痕静，藏蝉柏叶稠。名山思偏往，早晚到嵩丘。

南池

萧条微雨绝，荒岸抱清源。入舫山侵塞，分泉稻一作道接村。秋声依树色，月影在蒲根。淹泊方难遂，他宵关梦魂。

寄龙池寺贞空二上人

受请终南往，俱妨去石桥。林中秋信绝，峰顶夜禅遥。寒草烟藏虎，高松月照耀。霜天期到寺，寺置即前朝。

送贞空二上人

林下中餐后，天涯欲去时。衡阳过有伴，梦泽出应迟。石磬疏寒韵，铜瓶结夜澌。殷勤讶此别，且未定归期。

送裴校书

拜官从秘省，署职在藩维。多故长疏索，高秋远别离。天寒泗上醉，夜静岳阳棋。使府临南海，帆飞到不迟。

升道一作丹阳精舍南台对月寄姚合

月向南台风，秋霜洗涤余。出逢危叶落，静看一作益众峰疏。冷露常一作寻时有，禅窗此夜虚。相思聊怅望，润气遍衣初一作裾。

即事

索莫对孤一作寒灯，阴云积几层。自嗟怜一作邻十上，谁肯待三徵？心被通人见，文叨大匠称。悲秋秦塞草，怀古汉家陵。城静高崖树，漏多幽沼冰。过声冰岛鹭，绝行石庵僧。岂谓一作为旧庐在，谁言归未曾？

黄子陂上韩吏部

石楼云一作云一别，二十二三春。相逐升堂者，几为埋骨人。涕流闻度一作染瘴，病起喜一作贺还秦。曾是令一作今勤道，非惟卹在迍。疏衣蕉缕细，爽味茗芽新。钟绝滴残雨，蛩多无近邻。溪潭承到数，位秩见辞频。若个山招一作中隐，机忘任此身。

投李益

四十归燕字，千一作十年外始吟。已将书北岳，不用比南金。

吊孟协律

才行古人齐，生前品位低。葬时贫卖马，远一作迹日哭惟妻。孤冢北邙外，空斋中岳西。集诗应万首，物象遍曾题。

送人适越

高城满夕阳，何事欲沾裳。迁客蓬蒿暮，游人道路长。晴湖胜镜碧，寒柳似金黄。若有相思梦，殷勤载八行。

送僧游衡岳

心知衡岳路，不怕去人稀。船里犹鸣磬，溪头自曝衣。有家从小别，无

寺不言归。料得逢寒住，当禅雪满扉。

送路一本有某从军三字

别我就蓬蒿，日斜飞伯劳。龙门流水急，嵩岳片云高。叹命无知己，梳头落白毛。从军当此去，风起广陵涛。

洛阳道中寄弟

趋走迫流年，渐经此路一作地偏。密云埋二室，积雪度三川。生类梗萍泛，悲无金石坚。翻鸿有归翼，极目仰联翩。

登江亭晚望

浩渺浸云根，烟岚没远村。鸟归沙有迹，帆过浪无痕。望水知柔性，看山欲倦魂。纵情犹未已，回马欲黄昏。

送耿处士

一瓶离别酒，未尽即言行。万水千山路，孤舟几月程。川原秋色静，芦苇晚风鸣。迢递不归客，人传虚隐名。

过唐校书书斋

池满风吹竹，时时得爽神。声齐雏鸟语，画卷老僧真。月出行几步，花开到四邻。江湖心自切，未可挂头巾。

送杜秀才东游

东游谁见待，尽室寄长安。别后一作夜叶频落，去程一作登途山已寒。大河风色度，旷野烧烟残。匣有青铜镜，时将照鬓看。

送天台僧

远梦归华顶，扁舟背岳阳。寒蔬

修净食，夜浪动禅床。雁过孤峰晓一作晚，猿啼一树霜。身心无别念，余习在诗一作文章。

怀紫阁隐者

寂寥思隐者，孤烛坐秋霖。梨栗猿喜熟，云山僧说深。寄书应不到，结伴拟同寻。废寝方终夕，迢迢一作沈沈紫阁心。

雨夜同厉玄怀皇甫荀

桐竹绕庭匝，雨多风更吹。还如旧山夜，卧听瀑泉时。磻雁来期近，秋钟到梦迟。沟西吟苦客，中夕话兼思。

秋暮

北门杨柳叶，不觉已缤纷。值鹤因临水，迎僧忽背云。白须相并出，清一作暗泪两行分。默默空朝夕，苦吟谁喜闻？

哭胡遇

夭寿知齐理，何曾免叹嗟。祭回一作葬时收朔雪，吊后一作罢折寒花。野水秋吟一作吟秋断，空山暮影一作影幕斜。弟兄相识遍，犹一作那得到一作见君家。

送丹师归闽中

波涛路杳然。衰柳落阳蝉。行李经雷电，禅前漱岛泉。归林久别寺，过越未离船。自说从今去，身应老海边。

送安南惟鉴法师

讲经春殿里，花绕御床飞。南海几回渡一作过，旧山临老归。潮摇蛮

草落，月湿岛松微。一作触风香损印，
沾雨磬生衣。空水既如彼一作云水路
迢递，往来消息稀。

题李凝幽居

闲居少邻并，草径入荒园。鸟宿
池边一作中树，僧敲月下门。过桥分
野色，移石动云根。暂去还来此，幽居
不负言。

送韩湘

挂席从古一作中路，长风起广津。
楚城花未发，上苑蝶来新。半没湖波
月，初生岛草青。孤霞临石镜，极浦映
村神。细响吟干苇，余磬动远蘋。欲
凭将一札，寄与沃洲人。

寄董武

虽同一城里，少省得从容。门掩
园林僻，日高巾帻慵。孤鸿来半夜，积
雪在诸峰。正忆毗陵窗，声声隔水钟。

宿赞上人房

阶前多是竹，闲地拟栽松。朱点
草书疏，雪平麻履踪。御沟寒夜雨，官
寺静时钟。此时一作室无他事，来寻
一作多不厌重。

访李甘原居

原西居处静，门对曲江开。石缝
衔枯草，查根上净一作渍古苔。翠微
泉夜落，紫阁鸟时来。仍忆寻淇岸，同
行采蕨回。

题山寺井

沈沈百尺余，功就岂斯须。汲早

僧出定，凿新虫自无。藏源重嶂底，澄
翳大空隅。此地如经劫，凉潭会共枯。

僻居无可上人相访

自从居此地，少有事相关。积雨
荒邻圃，秋池照远山。砚中枯叶落，枕
上断云闲。野客将禅子，依依偏往还。

送李余及第归蜀

知音伸久屈，覲省去光辉。津渡
逢清夜，途程尽翠微。云当绵竹叠，鸟
离锦江飞。肯寄书来否，原居出亦一
作甚稀。

荒斋

草合径微微，终南对掩扉。晚凉
疏雨绝，初晓远山一作蝉稀。落叶无
青地，闲身著白衣。朴愚犹一作由本
性，不是学忘机。

夜喜贺兰三见访

漏钟仍夜浅，时节欲秋分。泉聒
栖松鹤，风除翳月云。踏苔行引兴，枕
石卧论文。即此寻常静，来多只是君。

题青龙寺镜公房

一夕曾留宿，终南摇落时。孤灯
冈一作龕舍掩，残磬雪风吹。树老因
寒折，泉深出井迟。疏慵岂有事，多失
上方期。

送陈判官赴绥一作天德

将军邀入幕，束带便离家。身暖
蕉衣窄，天寒碛日斜。火烧冈断苇一
作草，风卷雪平一作和沙。丝竹丰州
有，春来只欠花。

送唐环归敷水庄

毛女峰当户，日高头未梳。地侵山影扫，叶带露痕书。松径僧寻药，一作庙，沙泉鹤见鱼。一川风景好，一作人境别，恨不有吾庐。

原东居喜唐温琪频至

曲江春草生，紫阁雪分明。汲井尝泉味，听钟问寺名。墨研秋日雨。茶试老僧铛。地近劳频访，乌纱出送迎。

送馱法师

度岁不相见，严冬始一作知出关。孤烟寒色树，高雪夕阳山。瀑布寺应到，牡丹房甚闲一作寒。南朝遗迹在，此去几时还。

寄钱庶子

曲江春水满，北岸掩一作枕柴关。只有僧邻舍，全无芸映山。树阴终日扫，药债一作诗价隔年还。犹记听琴夜，寒灯竹屋间。

原上秋居

关西一作山又落木，心事复如何？岁月辞山久，秋霖入夜多。鸟从井口出，人自洛一作岳阳过，倚杖聊闲望，田家未剪禾。

夏夜

原寺偏邻近，开门物景澄。磬通多叶罽，月离片云秊。寄宿山中鸟，相寻海畔僧。唯愁秋色至，乍可在炎蒸。

冬夜

羁旅复经冬，瓢空盎亦空。泪流寒枕上，迹绝旧山一作溪中。凌结浮萍水，雪和衰柳风。曙光鸡未报，嘹唳两三鸿。

送厉宗上人

拥策背峨峨，终南雨雪和。漱泉秋鹤至，禅树夜猿过。高顶白云尽，前山黄叶多。曾吟庐岳上，月动九江波。

寄李存穆

闻道船中病，似忧亲弟兄。信来从水路，身去到柴城。久别长须鬓，相思书姓名。忽然消息绝，频梦却还京。

赠无怀禅师

身无劫劫修，果以此生周。禅定石床暖，月移山树秋。捧盂观宿饭，敲磬过清流。不掩玄关路，教人问白一作到头。

寄武功姚主簿

居枕江沔北，情悬渭曲西。数宵曾梦见，几处得书披。驿路穿荒坂，公田带淤泥。静棋功奥妙，闲作韵清凄。锄草留丛药，寻山上石梯。客回河水涨，风起夕阳低。空地苔连井，孤村火隔溪。卷帘黄叶落，锁印子规啼。陇色澄秋月，边声入战鼙。会须过县去，况是屡招携。

题刘华书斋

白石床无尘，青松树一作林有鳞。一莺啼带雨，两树合一作各从春。荒榭苔胶砌，幽丛果堕榛。偶来疏或数，

当暑夕胜晨。露滴星河水，巢重草木薪。终南同往意，赵北独游身。渡叶司天漏，惊蛰远地人。机清公干族一作疾，也莫卧漳滨。

送卢秀才游潞府

雨余滋润在，风不起尘沙。边日寡文思，送君吟月华。过山干相府，临水宿僧家。能赋焉长屈，芳一作他春宴杏花。

送南康姚明府

铜章美少年，小邑在南天。版籍多迁客，封疆接洞田。静江鸣野鼓，发缆带村烟。却笑陶元亮，何须忆醉眠。

送友人弃官游江左

羨君休作尉，万事且全身。寰海多虞日，江湖独往人。姓名何处变，鸥鸟几时亲。别后吴中使，应须访子真。

雨中怀友人

对雨思君子，尝茶近竹幽。儒家邻古寺，不到又逢秋。

寄远

家在锦水上，身征辽海边。十书九不到，一到忽经年。

南斋

独自南斋卧，神闲景亦空。有山来枕上，无事到心中。帘卷侵床月，屏遮入座风。望春春未至，应在海门东。

早春题友人湖上新居二首一作项斯诗

近得云中路一作看，门长侵早开。到时犹有雪，行处已无苔。劝酒客初醉，留茶僧未来。每逢晴暖日，惟见乞花栽。

门不当官道，行人到亦稀。故从餐后出，多是夜深归。开篋收诗卷，扫床移卧衣。几时同买宅，相送一作近有柴扉。

送雍陶入蜀

江山事若谿，那肯滞云南。草色分危磴，杉阴近古潭。日斜褒谷鸟，夏浅峿州蚕。吾自疑双鬓，相逢更不堪。

张郎中过原东居

年长惟添懒，经旬止掩关。高人餐药后，下马此林间。对坐天将暮，同来客亦闲。几时能重至，水味似深山。

答王建一本无建字秘书

人皆闻蟋蟀，我独恨一作叹蹉跎。白发无心镊，青山去意多。信来漳浦岸，期负洞庭波。时扫高槐影，朝回或恐过。

送李余往湖南

昔去候温凉，秋山满楚乡。今来从辟命，春物遍岑阳。岳石挂海雪，野枫堆渚樯。若寻吾祖宅，寂寞在潇湘。

偶作

野步随吾意，那知是与非。稔年时雨足，闰月暮蝉稀。独树依冈老，遥

峰出草微。园林自有主，宿鸟且同归。 归梦夕，星冷玉泉秋。

过雍秀才居

夏木鸟巢边，终南岭色鲜。就凉安坐石，煮茗汲邻泉。钟远清霄半，蜩稀暑雨前。幽斋如葺罢，约我一来眠。

寄顾非熊

知君归有处，山水亦难齐。犹去潇湘远，不闻猿狖啼。穴通茆岭下，潮满石头一作城西。独立生遥思，秋原日渐低。

送神邕法师

柳絮落蒙蒙，西州道路中。相逢一作留春忽尽，独去讲初终。行疾遥山雨，眠迟后夜风。绕房三两树，回日一作去叶应红。

送慈恩寺霄韵法师谒太原李司空

何故谒司空，山云知几重。磻遥来雁尽，雪急去僧逢。清磬先寒角，禅灯彻晓烽一作峰。旧房闲片石，倚著最高松。

送知兴上人

久住巴兴寺，如今始拂衣。欲临秋水别，不向故园一作山归。锡挂天涯树，房开一作闲岳顶扉。下看千一作作万里晓，霜海日生微。

送惠雅法师归玉泉

只到一作向潇湘水，洞庭湖未游。饮泉看月别，下峡听猿愁一作浮。讲不停雷雨，吟当一作曾近海流。降霜

忆江上吴处士

闽国杨帆去，蟾蜍亏一作还复团。秋风生渭水，落叶满长安。此地聚会夕，当时雷雨寒。兰桡殊未返，消息海云端。

题张一和章博士新居

青枫何不种，林在洞庭村。应为三湘远，难移万里根。斗牛初过伏，菡萏欲香门。一作斗移亭北榭，莲照水边门。旧即湖山隐，新庐葺此源。

石一作百门陂留辞从叔谟

幽鸟飞不远，此行千里间。寒冲陂水雾，醉下菊花山。有耻长为客，无成又入关。何时临涧柳，吾党共来攀。

送朱兵曹回越

星彩练中见，澄江岂有泥。潮生垂钓罢，楚尽去樯西。磻鸟辞沙至，山鹧隔水啼。会稽半侵海，涛白禹祠溪。

怀博陵故人

孤城易不头，不忘旧交游。雪压围棋石，风吹饮酒楼。路遥千万里，人别十三秋。吟苦相思处，天寒水急流。

夕思

秋宵已难曙，漏向二更分。我忆山水坐，虫当寂寞闻。洞庭风落木，天姥月离云。会自东浮去，将何欲致君？

寄河中杨不尹

非惟咎曩时，投刺诣门迟。怅望

三秋后，参差万里期。禹流疏凿迹，舜在寂寥词。此到一作致杳难共，回风逐所思。

孟融逸人

孟君临水居，不食水中鱼。衣褐唯粗帛，筐箱只素书。树林幽鸟恋，世界此心疏。拟棹孤舟去，何峰又结庐？

晚晴见终南诸峰

秦分一作下积多峰，连巴势不穷。半旬藏雨里，此日到窗中。圆魄将升兔，高空一作虚欲叫鸿。故山思不见，碣石沈寥东。

宿池上

泉来从绝壑，亭敞在中流。竹密无空岸，松长可绊舟。蟪蛄潭上夜，河汉岛前秋。异夕一作日期深涨，携琴却此游。

喜姚郎中自杭州回

路多枫树林，累日泊清阴。来去泛流水，悠然适此心。一披江上作，三起月中吟。东省期司谏，云门悔不寻。

送郑长史之岭南一本题作送郑史

云林颇重叠，岑渚复幽奇。汨水斜阳岸，骚人正则祠。苍梧多蟋蟀，白露湿江蓠。擢第荣南去，晨昏近九疑。

送李溟谒宥州李权使君

英雄典宥州，迢递苦吟游。风宿骊山下，月斜灞水流。去时初落时，回日定非一作无秋。太守携才子，看鹏百尺楼。

永福湖和杨郑州

积水还平岸，春来引郑溪。旧渠通郭外，新堰绝湖西。嵩少分明对，潇湘阔狭齐。客游随庶子，孤屿草萋萋。

题长江一本有斤字

言心俱好静，羸署落晖空。归吏封宵钥，行蛇入古桐。长江频雨后，明月众星中。若任迁人去，西溪一作浮与剡通。

泥阳馆

客愁何并起，暮送故人回。废馆秋萤出，空城寒雨来。夕阳飘白露，树影扫青苔。独坐离容惨，孤灯照不开。

送徐员外赴河中

原野正萧瑟，中间分散情。吏从甘扈罢，诏许朔方行。边日一作月沉残角，河关截夜城。云居闲独往，长老出房迎。

送贺兰上人

野僧来别我，略坐傍泉沙。远道擎空钵，深山蹋落花。无师禅自解，有格句堪夸。此去非缘事，孤云不定家。

全唐诗卷五百七十三

贾岛

送令狐绹一作无绹字相公

梁园趋戟节，海草几枯春。风水难遭便，差池未振鳞。姓名犹语及，门馆阻何因？苦似修文卷，重擎献匠人。吟看青岛处，朝退赤墀晨。根爱杉栽活，枝怜雪霰新。缀篇嗟调逸，不和摧才贫。早晚还霖雨，滂沱洗月轮。握苗方灭裂，成器待陶钧。因板思回顾，迷邦辄问津。数行望外札，绝句握中珍。是日荣游汴，当时怯往陈。鸿春乖汉爵，桢病卧漳滨。岳整五千仞，云惟一片身。故云离一作心未死，秋水宿经旬。下第能无恶，高科恐有神。罢耕田料废，省钓岸应榛。慷慨知音在，谁能泪堕巾？

寄沧州李尚书

沧溟深绝阔，西岸郭东门。弋者罗夷鸟，桴人思峤猿。威棱高腊冽，煦育极春温。波淀封疆内，蒹葭壁垒根。摇鞞边地脉，愁箭虎狼魂。水县卖纱市，盐田煮海村。枝条分御吐，家世食唐恩。武可纵横讲，功从战伐论。天涯生月片，屿顶涌泉源。非是泥池物，方因一作应雷雨尊。沉谋藏未露，邻境帖无喧。青冢骄回鹘，萧关陷吐蕃。

何时霖岁旱，早晚雪邦冤。迢递瞻旌纛，浮阳寄咏言。

逢旧识

几岁阻干戈，今朝劝酒歌。羨君无白发，走马过黄河。旧宅兵烧尽，新宫日奏一作奉多。妖星还在角，数尺铁重磨。

崇圣寺斌公房

近来惟一食，树下掩禅扉。落日寒山磬，多年坏衲衣。白须长更剃，青霭远还归。仍说游南岳，经行是息机。

送李傅侍郎一作御剑南行营

走马从边事，新恩受外台。勇看双节出，期破八蛮回。许国家无恋，盘江栈不摧。移军刁斗逐，报捷剑门开。角咽猕猴叫，鼙干霹雳来。去年新甸邑，犹滞佐时才。

别徐明府一作甫

抱琴非本意，生事偶相萦。口尚袁安节，身无子贱名。地寒春雪盛，山浅夕风轻。百战余荒野，千夫渐耦一作遍耕。一杯宜独夜，孤客恋交情。明日疲骖去，萧条过古城。

岐下送友人归襄阳

蹉跎随泛梗，羁旅到西州。举翮笼中鸟，知心海上鸥。山光分首一作手暮，草色向家秋。若更登高岘，看确定泪流。

送友人游蜀

万岑深积翠，路向此中难。欲暮多羁思，因高莫远看。卓家人寂寞，扬子业凋残。唯有岷江水，悠悠带月寒。

送郑少府

江岸一相见，空令惜此分。夕一作溢阳行带月，酌水少留君。野地初一作多烧草，荒山过雪云。明年还调集，蝉可在家闻。

子规一作项斯诗

游魂自相叫，宁复记前身。飞过邻家月，声连一作怜野路一作寺春。梦边催晓急，愁处送风频。自有沾花血，相和雨滴新。

送僧归天台

辞秦经越过，归寺海西峰。石洞双流水，山门九里松。曾闻清禁漏，却听赤城钟。妙宇一作文研磨讲，应齐智者踪。

让纠曹上乐使君

战战复兢兢，犹如履薄冰。虽然叨一掾，还似说三乘。瓶汲南溪水，书来北岳僧。慧愚兼抱疾，权纪不相应。

赠友人

五字诗成卷，清新韵具一作少得

偕。不同狂客醉，自伴律僧斋。夸别和花树，秋辞带月淮。却归登第日，名近榜头排。

送雍陶及第归成都宁亲一作覲

不唯诗著籍，兼又赋知名。议论于题称，春秋对问精。半应阴隲与，全赖有司平。归去峰一作岩峦众，别来松桂生。涨江流水品一作凸，当道白云坑。勿以攻文捷一作健，而将学剑轻。制衣新濯锦，开酝旧烧罍。同日升科士，谁同膝下荣？

谢令狐绹一本无绹字相公赐衣九事

长江飞鸟外，主簿跨驴归。逐客寒前夜，元戎予厚衣。雪来松更绿，霜降月弥辉。即日一作入调殷鼎，朝分是与非。

送金州鉴周上人

地一作池必寻天目，溪仍住若耶。帆随风便发，月不要云遮。极浦浮霜雁，回潮落海查。峨眉省春上，立雪指流沙。

送谭远上人

下视白云时，山房盖一作挂树皮。垂一作雪枝松落子，侧一作佛顶鹤听棋。清净从沙劫，中终未日鼓。金光明本行，同侍出峨眉。

新年

嗟以龙钟身一作貌，如何岁复新。石门思隐久，铜镜强窥频。花发新移树，心知故国春。谁能平此恨，岂是北

宗人。

送僧

出家从少岁，解论造玄门。不惜挥谈柄，谁能听至言？中时山果熟，后夏竹阴繁。此去逢何日，峨嵋晓复昏。

送姚杭州

白云峰下城，日夕白云生。人老江波一作鱼江钩，由侵海树耕。吴山钟入越，莲叶吹摇旌。诗异石门思，涛来向越一作远迎一作阁上迎。

夜集田卿宅

郎咏高斋下，如将古调弹。翻鸿向桂水，来雪渡桑乾。滴滴玉漏曙，脩脩竹簌残。曩年曾宿此，亦值五陵寒。

寄山友一作中长孙栖桥

此时气萧飒一作瑟，琴院可应关。鹤似君无事，风吹雨遍山。松生青石上，泉落白云间。有径连高一作嵩顶，心期相与还。

酬厉玄

我来从北鄙，子省涉一作度西陵。白发初相识，秋山拟共登。邻居帝城雨，会宿御沟冰。未报见一作君贻作，耿然中夜兴。

送刘式洛中覲省

晴峰三十六，侍立上春台。同宿别离恨，共看星月回。野莺临苑语，河棹历江来。便寄相思札，缄封花下开。

送空公往金州

七百里山水，手中柳栗粗。松生师坐石，潭淥祖传盂。长拟老岳峤，又闻思海湖。惠能同俗姓，不是岭南卢。

赠绍明上人

未住青云一作龙室，中秋独往年。上方蒿若一作古寺，下视雨和一作如烟。祖岂无言去，心因断臂传。不知能已后，更有几灯然。

赠弘泉上人

洗足下蓝岭，古师精进同。心知溪卉长，居此玉林空。西殿宵灯磬，东林曙雨风。旧峰邻太白，石座雨苔蒙。

送宣皎上人游太白

剃发鬓无雪，去年三十三。山过春草寺，磬度落花潭。得句才邻约，论宗意在南。峰灵疑懒下，苍翠太虚参。

病起

高一作嵩丘归未得，空自责迟回。身事岂能遂，兰花又已开。病令新作少，雨阻故人来。灯下南华卷，祛愁当酒杯。

送殷侍御赴同州

冯翊蒲西一作连郡，沙冈拥地形。中条全离岳，清渭半和泾。夜暮一作久眠明月，秋深一作新至洞庭。犹来交辟士一作由来交臂者，事别一作事偃林扃。

送沈鹤

家楚婿于秦，携妻去养亲。陆行

千里外，风卷一帆新。夜泊疏山雨，秋吟捣药轮。芜城登眺作一作后，才动广陵人。

秋夜仰怀钱孟二公琴客会

月色四时好，秋光君一作吾子知。南山昨夜雨，为我写一作寄清规。独鹤耸寒骨，高杉韵细颺。仙家缥缈弄，仿佛此中期。

赠李金州

绮里祠前后，山程践白云。溯流随大旆，登岸见全军。晓角吹人梦，秋风卷雁群。雾开方露日，汉水底一作与沙分。

酬姚合一本无合字校书

因贫行远道一作道远，得见旧交游。美酒易倾尽，好诗难卒酬。公堂朝共到，私第夜相留。不觉入关晚，别来林木秋。

送独孤马二秀才居明月山读书

濯志俱高洁，儒科慕冉颜。家辞临水郡，雨到读书山。栖鸟棕花上，声钟砾一作栎阁间。寂寥窗户外，时见一舟还。

病蝉

病蝉飞不得，向我掌中行。拆翼犹能薄，酸吟尚极清。露华凝在腹，尘点误侵睛。黄雀并一作兼莺一作鸟鸟，俱怀害尔情。

青门里作

燕存鸿已过，海内几人愁。欲问

南宗理，将归北岳修。若无攀桂分，只是卧云休。泉树一为别，依稀三十秋。

卢秀才南台

居在青门里，台当千万岑。下因冈助势，上有树交阴。陵远根才近一作辨，空长畔可寻。新晴登啸处一作月，惊起宿枝禽。

寄李辇侍郎

终过盟津书，分明梦不虚。人从清渭别，地隔太行余。宾幕谁嫌静，公门但晏如。枴鞮干霹雳，斜汉湿蟾蜍。追琢垂今后，敦庞得古初。井台怜操筑，漳岸想丕疏。亦翼铿珉珮，终当直石渠。此身多抱疾，幽里近营居。忆漱苏门涧，经浮楚泽潞。松栽侵古影，劳断尚芹苴。语嘿曾延接，心源离滓淤。谁言姓琴氏，独跨角生鱼。

寄令狐绹一本无绹字相公

驴骏胜羸马，东川路匪赊。一缄论贾谊，三蜀寄严家。澄彻霜江水，分明露石沙。语言声及政，栈阁谷离斜。自著衣偏暖，谁忧雪六花。裹裳留阔襪，防患与通茶。山馆中宵起，星河残月华。双僮前日雇，数口向天涯。良乐知骐骥，张雷验镆铢。谦光贤将相，别纸圣龙蛇。岂有斯言玷，应无白璧瑕。不妨圆魄里，人亦指虾蟆。

再投李益常侍

何处初投刺，当时赴尹京。淹留花柳一作木变，然诺肺肠倾。避暑蝉移树，高眠一作登高雁过城。人家嵩岳色，公府洛河声。联句逢秋尽，尝茶

见月生。新衣裁白苧，思从曲江行。

霞切，无家岁月迷。清宵话白阁，已负十一作数年栖。

积雪

昔一作省属时霖滞，今逢腊雪多。
南猜飘桂渚，北讶雨交河。尽灭平芜色，弥重古木柯。空中离白气，岛外下沧波。隐者迷樵道，朝人冷玉珂。夕繁仍昼密，漏间复钟和。想积高嵩顶，新秋皎一作皓月过。

过杨一作阳道士居

先生修道处，茆屋远嚣氛。叩齿坐明月，揅颐望白云。精神含药色，衣服带霞纹。无话一作每语瀛洲路，多年别少君。

赠僧

乱山秋木穴，里有灵蛇藏。铁锡挂临一作陵海一作锡挂临沧海，石楼闻异香。出尘头未白，入定衲凝霜。莫话五湖事，令人心欲狂。

送友人游塞

飘蓬多塞下，君见益潸然。迢递沙衔日，长河水接天。夜泉行客火，晓戍向京烟。少结相思恨，佳期芳草前。

思游边友人

凝愁对孤烛，昨日饮离杯。叶一作邨下故人去，天中新雁来。连沙秋草薄，带雪暮山开。苑北红尘道，何时见远回？

秋暮寄友人

寥落关河暮，霜风树叶低。远天垂地外，寒日下峰一作山西。有志烟

寄令狐绹一本无绹字相公

官高频一作蒙明敕授，老免把梨锄。一主长江印，三封东省书。不无濠上思，唯食圃中蔬。梦幻将泡影，浮生事只如。

和孟逸人林下道情

四气一作时相陶铸，中庸道岂销！夏云生此日，春色尽今朝。陋巷贫无闷，毗耶疾未调。已栽天一作毫末柏，合抱岂非遥。

宿姚少府北斋

石溪同夜泛，复此北斋期。鸟绝吏归后，蛩鸣客卧时。锁城凉雨细，开印曙钟迟。忆此漳川岸，如今是别离。

雪晴晚望

倚杖望晴雪，溪云几万重。樵人归白屋，寒日下危峰。野火烧冈草，断烟生石一作古松。却回山寺路，闻打暮天钟。

送崔峒游潇湘

功烈尚书孙，琢磨风雅言。渡河山凿处，陡岷汉滩喧。梦想吟天目，宵同话石门。枫林叶欲下，极浦月清暾。

寄朱锡珪

远泊与谁同，来从古木中。长江人钓月，旷野火烧风。梦泽吞楚大，闽山阨一作隐海丛。此时橘底水，涛起屈原通。

马戴居华山因寄

玉女洗头盆，孤高不可言。瀑流莲岳顶，河注华山根。绝雀林藏鹘，无人境有猿。秋蟾才过雨，石上古松门。

寄胡遇

一自残春别，经炎复到凉。萤从枯树出，蛩入破阶藏。落叶书胜纸，闲砧坐当床。东门因送客，相访又何妨。

送李戎扶侍往寿安

二千余里路，一半是波涛。未晓著衣起，出城逢日高。关山多寇盗，扶持带弓刀。临别不挥泪，谁知心郁陶？

送孙逸人

衣履犹同俗，妻儿亦宛然。不餐能累月，无病一作疾已多年。是药皆谕性，令人渐信仙。杖头书数卷，荷入翠微烟。

寄华山僧

遥知白石室，松柏隐朦胧。月落看心次，云生闭目中。五更钟隔岳，万尺水悬空。苔藓嵌岩所，依稀有径通。

送李登少府

伊阳耽酒尉，郎咏醉醒新。应见嵩山里，明年踰躅春。一千寻树直，三十六峰邻。流水潺潺处，坚贞玉润珉。

易州赤郝逸人居

每逢词翰客，邀我共寻君。果见闲居赋，未曾流俗闻。也知邻市井，宛似出嚣一作尘氛。却笑巢由辈，何须隐白云？

酬鄆县李廓少府见寄

稍怜公事退，复遇夕阳过。北朔霜凝竹，南山水入簷。吟怀沧海侣，空问白云师。恨不相从去，心惟野鹤知。

净业寺与前鄆县李廓少府同宿

来从城上峰，京寺暮相逢。往往语复默，微微雨洒松。家贫初罢吏，年长畏闻蛩。前日犹拘束，披衣起晓钟。

送南卓归京

残春别镜陂，罢郡未霜髭。行李逢炎暑，山泉满路岐。云藏巢鹤树，风触啜莺枝。三省同虚位，双旌带去思。人城背城后，待漏月沉时。长策并忠告，从容写玉墀一作池。

卧疾走笔酬韩愈书问

一卧三四旬，数书惟独一作书至。独思君。愿为出海月，不作归山云。身上衣频寄一作蒙与，瓠中物亦分。欲知强健否，病鹤未离群。

长孙霞李溟自紫阁白阁二峰见访

寂寞吾庐贫，同来二阁人。所论唯野事，招作一作访我住云邻。古诗期秋宿，平林散早春。漱流今已矣，巢许岂尧臣。

送惟一游清凉寺

去有巡台侣，荒溪众树分。瓶残秦地水，锡入晋山云。秋月离喧见，寒泉出定闻。人间临欲别，旬日雨纷纷。